



Petaling Jaya, Cheras, Banting, Nilai dan Seremban catat bacaan IPU tidak sihat

Oleh Ercy Gracella Ajos - Oktober 3, 2023 @ 9:43am

bhnews@bh.com.my

KUALA LUMPUR: Lima stesen di Petaling Jaya, Cheras, Banting, Nilai dan Seremban mencatatkan bacaan Indeks Pencemaran Udara (IPU) tidak sihat apabila merekodkan bacaan melebihi 101 pagi ini.

Bacaan IPU antara 0 hingga 50 dikategorikan sebagai baik, 51 hingga 100 (sederhana), 101 hingga 200 (tidak sihat), 201 hingga 300 (sangat tidak sihat) dan 300 ke atas (berbahaya).

Berdasarkan kemas kini terbaru di laman sesawang Sistem Pengurusan Indeks Pencemaran Udara Malaysia (APIMS) setakat jam 9 pagi, bacaan IPU di Nilai, Negeri Sembilan ialah 156, diikuti di Cheras (154) dan Seremban (142) manakala dua lagi stesen iaitu di Banting, Selangor dan Petaling Jaya, pula masing-masing merekodkan bacaan 119 dan 109.

Sementara itu, 60 kawasan di seluruh negara merekodkan IPU tahap sederhana dengan bacaan 51 hingga 100.

Antara kawasan yang berada dalam bacaan IPU itu adalah Mentakab, Pahang dengan bacaan 68, Seri Manjung, Perak (67), Tangkak, Johor (82), Mukah, Sarawak (60) dan Keningau, Sabah (58).

Data sama turut menunjukkan hanya tiga kawasan di seluruh negara merekodkan tahap IPU yang baik dengan bacaan antara 0 hingga 50.

Kawasan terbabit ialah Kimanis, Sabah dan Langkawi di Kedah dengan bacaan masing-masing 50 serta Kangar, Perlis (47).